

開放文學 – 歷代筆記 – 夷堅丁志 卷第十三

邢舜舉 邢舜舉者·大觀間·由武舉入官·為虢州巡檢·平生耽好道術·凡以一技至·必與之友·嘗獨行郊外·逢婦人竹冠道服·前揖曰·君非邢良輔乎·曰·然·一生何所好·曰·好修養術·然學之頗久·了未睹其妙·曰·君雖酷好·奈俗情未斷何·吾與君一藥·用新水服之·非唯延齡·又能斷眾疾·亦修真之一端也·邢喜謝曰·幸甚·固未暇即服·又探袖中取一方·目曰還少丹·授之曰·願此當有益·稍疑其異人·試問休咎·曰·前程難立談·君中年將困厄·晚始見佳處耳·復扣其姓氏居止·笑曰·與君相從久·何問為·獨不憶壁間畫卷乎·乃我也·今日故告君·必敬必戒·毋忘斯言·忽不見·邢亟還舍審厥象·蓋所事何仙姑道貌·與適婦人無少異·怏怏自失·取水吞藥·且如方治丹·謹服之·覺精力益壯·顏色潤好·暨南渡出入岳少保之門·歷福建路鈐轄·坐岳事貶竄·不數年·並失一子·家道淪替·幾二十年·方得隨州鈐轄知郢州·後致仕·居襄陽·逮幹道癸巳·春秋八十九矣·略無病苦·目光如童兒·發不白·猶能上馬馳騁·人指為還丹之驗·後三年病·病起三月·又大瀉·腹中出一物如升·堅滑有光·無穢氣·邢慘然語旁人曰·藥丹既下·吾無生理矣·明日而卒·予弟景裴官襄陽·及見之·

高縣君

紹興二十四年·保義郎李琦·監和州東關鎮稅家頗豐贍·有高指使者·赴官舒州·與其妻來謁·願貸錢五萬為行裝·約終任償倍息·李如其數假之·高既滿任·欲如約·妻曰·百千不易辦·幸相去遠·彼未必來索·姑俟他日可也·高然其計·歸途過和州·不見李·後三年·李為黃州巡轄官·方晝倦臥·見高妻披驟皮來·拜堂上雲·負公家錢久·今來奉償·未及答·徑趨馬·李驚覺·卒報馬生牝驟·往視之·正臥母旁·未能動·李咨歎良久·與語曰·高大夫借錢·我固不介意·那至此·若果縣君也·盍起行·應聲跳躍行數步·李大驚異·遺書扣高生·其妻正用是日死·李飼養此驟不忍乘·外人或欲見·則徐徐牽以出·但呼為高縣君雲·

李遇與鬼鬥

無為君指使李遇·迎新郡守於城西·既行十餘里·聞尚遠·遂還家·忽百許小兒從路旁出·皆始四五歲·大呼而前·合圍擊之·李初不懼·與相歐·每奮拳必十數輩仆地·然才僕即起·已散復合·如是數四·有躍而登肩取巾擲發者·李益窘·走不可脫·且擊且前·一老叟布袍草屨·不知自何來·厲聲咄曰·此官人常持法華經·若損他·豈不累我·叱令退·小兒遂散·老人亦不見·李回及門不能行·門卒扶以歸·至家昏不醒·諸子揭衣視·但青痕遍體·即就其處招魂·呼僧誦經·涉半年餘·始策杖能出·老人疑為土地神雲·時紹興二十八年也·

潘秀才

漢陽學士潘秀才·晚醉出學前·臨荷池·欲彩蓮而不可得·見婦人從水濱來·行甚急·問潘曰·日已暮·何為立此·潘曰·汝為誰·曰·東家張氏女也·今夕父母並出·心相慕甚久·良時難失·故來就君·潘大喜·攜手同人·自是旦去暮來·未兩月積以羸悴·同捨生扣其由·秘不肯答·學正張盥苦詰之·乃具以告·張曰·子將死矣·彼果良家女·焉得每夜可出·又入宿學中·此非鬼即妖·若欲存性命·當為驗治·潘懼而求救·張取針串紅線付之·使密施諸衣裾上·是夕用其策·明日一學人分道·遍訪僧坊祠室·或於桃花廟壁上·見繪捧香梓仙女·紅線綴裙間·即以刀刮去·且碎其壁·怪遂不復至·

週三郎

潁昌舞陽縣石柱村·去縣十餘里·路中素有怪·村民李順者·入縣酣醉·抵暮跨驢歸·出門未遠·或自後呼其姓名·曰·我乃汝比鄰週三郎·適往縣市幹事回·腳氣忽發·步履絕艱苦·汝能與我共載還家·當作主人以報·順雖醉·尚亦知此地物怪·不敢應·亦不反顧·其人怒曰·相與鄰里·無人情如此·吾必與汝同此驢·語畢·已坐於鞍橋後·順甚窘·密解所服縑·轉手並繫之·加鞭亟行·漸近家·遽連聲欲下·曰·須奏廁·順復不對·又曰·汝且回頭看我·言至再三·順佯若不聞·到家寂寂無聲·呼其子就視·乃朽棺板也·斧而焚之·路怪由是遂絕·

漢陽石榴

紹興初·漢陽軍有寡婦·事姑甚謹·姑無疾而卒·鄰家誣婦置毒·訴於官·婦不勝考掠·服其辜·臨出獄·獄卒以石榴花一枝簪其髻·行及市曹·顧行刑者曰·為我取此花插坡上石縫中·既而祝曰·我實不殺姑·天若監之·願使花成樹·我若有罪·則花即日萎死·聞者皆憐之·乃就刑·明日花已生新葉·遂成樹·高三尺許·至今每歲結實·

昭惠齋

武昌村民共設昭惠齋·一牧童得饅頭二隻·以木葉包其一·置腰間魚挈中·將還家·天忽冥晦·雷電以風·童仆地·少頃復起行·見者問其故·童曰·初不聞雷聲·但見神人數百疾驅至·頗相逼·有老人握我手·曰·汝何敢以齋食置魚挈中·我答曰·欲歸遺母·老人喜·即揮眾使退·

孔勞蟲

孔思文·長沙人·居鄂州·少時曾遇張天師授法·並能治傳屍病·故人呼為孔勞蟲·荆南劉五客者·往來江湖·妻頓氏·與二子·在家夜坐·聞窗外人問劉五郎在否·頓氏左右顧·不見人·甚懼·不敢應·復言曰·歸時倩為我傳語·我去也·劉歸·妻道其事·議欲徙居·忽又有言曰·五郎在路不易·劉叱曰·何物怪鬼·頻來我家·我元不畏汝·笑曰·吾即五通神·非怪也·今將有求於君·苟能祀我·當使君畢世鉅富·無用長年賈販·汨沒風波間·獲利幾何·而蹈性命不可測之際·二者君宜詳思·可否在君·何必怒·遂去不復交談·劉固天資嗜利·頗然其說·遽於屋側建小祠·即有高車駟馬·傳呼而來·曰·郎君奉謁·劉出迎·客黃衫烏帽·容狀華楚·才入座·盤飧酒漿·絡繹精腆·自是日一來·無間朝暮·博奕嬉笑·四鄰莫測何人·金銀錢帛·贈餉不知數·如是一年·劉絕意客游·家人大以為無望之福·他夕因奕棋爭先·忿劉不假借·推局而起·明日劉訪篋中所畜·無一存·不勝悔怒·謀召道士治之·適孔生在焉·具以告·孔遣劉先還·繼詣祠所·炷香白曰·吾聞此家有崇豈汝乎·空中大笑曰·然·知劉五命君治我·君欲何為·不過效書符小技·吾正神也·何懼碌碌為·孔曰·聞神至靈·故修敬審實·何治之雲·問答良久·孔諳之曰·吾來見神·是客也·獨不能設茶相待耶·指顧間·茶已在桌上·孔曰·果不與劉宅作祟·盍供狀授我·初頗作難·既而言供與不妨·少頃·滿卓皆細字·如炭煤所書·不甚明瞭·孔謝去·慰以好語曰·今日定知為正神·劉五妄訴·勿恤也·適過相觸突·敢請罪·既退以語劉·料其夕當至·作法隱身·仗劍伏門左·夜未半·黃衣過來·冠服如初·徑入戶·孔舉劍揮之·大叫而沒·但見血中墮黃鼠半體·且而跡諸祠·正得上體於偶人下·蓋一大鼠也·毀廟碎像·怪訖息·

梁統制

鄂州選鋒軍統制梁興·嘗以廳前水斛竭·呼舍中卒訶問·卒謝罪·已而復然·梁大怒·欲加極·卒曰·每日滿貯水·其敢慢·有如公弗信·願至晚一臨視可知矣·乃釋之·但命輦水滿斛·然後退·明日復空·頗訝其異·戒使謹伺之·才二更·一大蟒從屋背垂首下飲·頃刻而盡·遽入曰·梁遣小校跡其所往·歷歷見過江至大別山下·直入深窟中·居人咸言此物穴居有年·未嘗為人害·人亦莫敢近也·明旦·梁呼帳下趙諱·領數十壯卒·操勁弓·傳毒矢·渡江·又令一人登山吹笛·少焉蟒出·立射殺之·數夕後·梁夢婦人來·作色言曰·我何罪於君·枉見殺·今相從索命·趨而前欲搏梁·梁大窘·即與之鬥·婦人不勝·曰·姑以大郎君為代·未幾長子果卒·諸兵死者數輩·餘亦大病·趙諱懼·晝夜焚香禱謝·僅得免·越四歲梁亡·漢陽人謂蟒為山神·故能報仇如是·然生不能庇其軀·舍江水不飲·而遠戀斛中·以自取禍何也·

李氏虎首

幹道五年八月·衡湘間寓居趙生妻李氏·苦頭風·痛不可忍·呻呼十餘日·婢妾侍疾·忽聞咆哮聲甚厲·驚視之·首已化為虎·急報趙至·問其由·已不能言·兒女圍繞拊之·但含淚捫幼子·若憐惜狀·與飲食·略不經目·與生肉·則攫取而食·六七日後·稍擱在旁兒女·如欲啖食·自是人莫敢近·趙昇置空室·扃其戶·日飼以生肉數斤·邀其友樊三官來·告之故欲除之·樊曰不可·李為人無狀·眾所共知·上天以此示警·若輒去之·殃咎必至·盍與之焚章告天·使得業盡而死·亦善事也·趙如其言·命道士作靈寶度人醮數筵·李方絕命·生時凶戾很妒·不孝翁姑·暴其親鄰·趙生不敢校·及是無人憐之者·右十事皆梅師忠說·張尚書兒

張克公尚書夫人劉氏·生三子·皆不育·其狀甚異·一無舌·一陰囊有腎十枚·張公竟無子·劉夫人御婢妾少恩·每嗔恚·輒閉諸空室不與食·晚年不能飲啖·十日共食米一升·銷瘦骨立·乃卒·人以為業報雲·劉氏·予外姑之姊也·

問四老

方城縣鄉民閻四老·得疾已亟·忽語其子曰·我且為驢·試視我打馬·展·即翹足仰身·翻覆作勢·其狀真與驢等·又曰·可刈細草和豨豆來·我欲飽食而死·家人泣而進之·據盆大嚼·略無遺餘·食畢復臥·少頃氣絕·問平生蓋在鄉里作牙儈者·

葉克己

壽昌葉克己·年十歲·時從其父大夫將居揚州·病赤目·繼以血利·久之大小便皆結塞·遇一僧曰·是服藥茹毒·元藏已壞·今當取而下之·即出外·旋剉治藥十兩許·攜入瀆以酒使服·預戒其家·具浴盆以俟·少焉腸胃痛徹·亟踞盆·有物墜於內·乃腐腸也·長丈許·如是者再·氣息僅屬·父兄謂必死·至晚忽呻呼索粥·且而履地·一家驚異之·俄大疽發於陰·尻間穿七竅·糞溺自其中出·臭污不堪聞·僧曰·此非俗人家所能供視·當隨吾以歸·既而不勝其煩·復以還葉氏·蓋又十年·從其兄行已·寓蘭溪·有道人過而語之曰·汝抱疾甚異·吾能識之·但飲我酒·明日為汝治·一錢不汝索也·即取酒二升與飲·喜曰·良醞也·所釀幾何·曰·五斗·戒使悉留之·乃去·明日果來·燒通赤火箸·刺入尾間六七寸·晏然如不覺·繼以冷箸塗藥·隨傳·之數反·又燒鐵鑿·烙疽上·皮皆焦落·然後摻藥·填六竅而存其一·曰·不可窒·此窒則死·兄在旁不忍視·掩袂而起·財兩夕·瘡痂盡脫·所烙處肉已平·六竅皆盈實·腹內別生木腸·自是與常人亡異·飲啖倍於他日·而所下糞全似雞·遂娶妻生子·年過五十·疽復發於臍下·洞腹乃死·凡無腸而活者四十二年·世間無此病也·二醫疑皆異人云·

臨安民

臨安民因病傷寒·而舌出過寸·無能治者·但以筆管通粥飲入口·每日坐於門·某道人見之·咨笑曰·吾能療此·頃刻間事耳·奈藥材不可得何·民家人聞而請曰·苟有錢可得·當竭力訪之·不肯告而去·明日又言之·會中貴人罷直歸·下馬觀病者·道人適至·其言如初·中貴固問所須·乃梅花片腦也·笑曰·此不難致·即遣僕馳取以付之·道人屑為末·摻舌上·隨手而縮·凡用二錢·病立愈·右二事葉行己孝恭說·

雞頭人